



Polyanthea Sacra

Ex Universæ Sacræ Scripturæ Utriusque Testamenti Figuris, Symbolis, Testimoniis, Nec Non E Selectis Patrum, Aliorumque Authorum, Sententiis, eruditis Interpretationibus, Similitudinibus, rarisque Historiis collecta, Et Copiosis, Exquisitisque Materiis Moralibus De Virtutibus Et Vitiis Pro ...

Spanner, Andreas

Augustae Vindelicorum, 1702

§. 28. Pœnitentiæ satisfactio.

[urn:nbn:de:hbz:466:1-79369](https://nbn-resolving.org/urn:nbn:de:hbz:466:1-79369)

erubuit; dum coram Deo de propriis verecundabatur peccatis, Dion. Carth. hic.
Vide Pudor.

§. XXVII.

*Pœnitentia impendit Deo, virtuti,
quæ prius peccato.*

Fecit & labrum æneum de speculis mulierum. Exod. 38. 8. Vide priscam devotionem, & ritum, quò sanctæ mulieres, præsertim cum se totas DEI obsequio dicebant, sua specula, & ornamenta; per quæ antea vanitatis, & Mundo, servierunt; jam conversæ secum pariter DEO consecrabant &c. Cornelius hic.

Judic. 6. 25. 26. præcipitur Gedeoni, destruere aram Baal, & nemus, quod ejus cultui dicatum erat; & offerre sacrificium super struem lignorum, quæ de nemore succidisset. Voluit DEUS, ut nemus, quod antea Baal inservierat, jam nunc DEO incipiat deservire, Rom. 6. 19. *Sicut exhibuistis &c.* Olorius fer. 2. Dom. Pass.

Lavabo per singulas noctes lectum meum. Psal. 6. 7. S. Basil. Seleuc. or. 17. per oculos contra jaculatus est, & lacrymis diabolum convulneravit. Pugnat; ut lacrymis ab offensione se vindicet: lamentando victoriam acquirit; & gemitibus gratiam trahit, luctum luctu medicatur. Vindicabat lacrymis concupiscentem oculum. S. Cyrill. Jerol. Catech. 2.

Exitus aquarum deduxerunt oculi mei, quia non custodierunt legem tuam. Ps. 118. 136. Genezardus: quia peccavi oculis; & oculorum concupiscentiâ; per oculos satis-feci, copiose lacrymando. Apud Sylveira in Luc. 7. 9. 13.

Construunt gladios suos in vomeres, & lanceas suas in falces. Isa. 2. 4. Quando id factum, ut gladii, qui sunt ad perdendam vitam, convertantur in aratrum, & instrumentum alendæ vitæ? Et lanceæ, quæ sunt ad occidendum, sint pro metendis alimentis? Hoc totum videmus in Paulo impletum, ait Tertull. 1. adv. gnost. c. 13. Paulus Apostolus de persecutore, qui prius Ecclesiæ sanguinem fudit, postea gladium stylô mutans, & convertens macharam in aratrum; lupus rapax Benjamin, Dein afferens ipse escam: Sylveira in Act. 9. 9. 2.

Lacrymis capit rigare pedes ejus. Luc. 7. 38. Quod sibi turpiter exhibuerat, hoc jam Deo laudabiliter offerebat. Oculis terrena concupierat; sed hos jam, per pœnitentiam contemns, flebat. Capillos ad compositionem vultus exhibuerat; sed jam capillis lacrymas tergebat &c. Quot ergo in se habuit oblectamenta, tot de se invenit holocausta. Convertit ad virtutum numerum numerum criminum: ut totum serviret Deo in pœnitentia, quicquid ex se Deum contemplerat in culpa. S. Gregor. in Evang. hom. 33. de pœnit. Magd.

Tolle grabatum tuum, & ambula. Joan. 5. 8. Animus miser diu ad voluptates corporis ferculo portatus fuit: mutatis vicibus jam animus

sit ferculum corporis; illud ad mandatorum Dei præscripta de portaturus. Escobar. t. 1. mir. Chr. l. 5. Sect. 2. Obf. 8.

Petit ab eo epistolas in Damascum. Act. 9. 2. Cur Saulus à Pontifice non petit mandata, sed epistolas? non decreta, provisiones? Perpende profundam Dei sapientiam: postulat illas ad Ecclesiam Dei destruendam: Ordinatus, ut ipse scribat, & nobis det epistolas divinæ sapientiæ plenas; ad fundandam, & illustrandam, Ecclesiam. O mutatio dextera Excelli! qui sic rerum ordinem, ac stylum, immutat; qui sic hostilia arma convertit in auxilia, & patrocinia. Et sic manus armata cum epistolis ad repugnandam Ecclesiam, fit manus armata cum epistolis ad fortiter pugnandum pro defensione ipsius Ecclesiæ. Sylveira hic. q. 2.

Ita levia peccata plangebatur; ut illam gravissimorum criminum crederes ream. Cumq; à nobis crebrius moneretur, ut parceret oculis, & eos servaret Evangelicæ lectioni; aiebat: turpanda est facies, quam, contra Dei præceptum, purpuris, & cerussâ, & stibio, sæpe depinxi. Affligendum corpus, quod multis vacavit deliciis: longus risus perpeti compensandus est fletu: mollia linteamina, & serica pretiosissima, asperitate cilicij commutanda. S. Hieron. ep. 27. ad Eustoch. Epitaph. Paulæ!

Quibus rebus provocasti Deum, per has rursum facito propitium, S. Chrysost. orat. de B. Philogonio.

§. XXVIII.

Pœnitentia satisfactio.

Consugit ad Dominum, pavens periculum-cumque deposuisset vestes regias &c. Eth. 14. 1. 2. Hæc bona erat dispositio ad misericordiam Dei impetrandam. Diezler. 5. D. Pass. *trascimini, & nolite peccare.* Psal. 4. 5. Quid est homo pœnitens, nisi sibi ipsi irascens. Glossa hic.

Sicut fragmen mali Punici, ita gene tuæ. Cant. 4. 3. Gilbertus l. 25. in Cant. bona equidem hæc fractio, per quam interior coepit virtus eminere; & quæ in carnis cortice continebatur, erumpere gratia: per hæc fragmenta salutis se nobis ubertas effudit. Audiant hæc peccatores ij, qui sibi blandiuntur de intima animi contritione, cum nihil patiantur in splendore vultus in ornatu corporis, in abundantia convivii, in risu, in hilaritate, non esse integrum. Baeza t. 3. l. 15. c. 7.

Oditi animam suam. Joan. 12. 25. qui abhorret, qualem fuisse meminit, præteritam vitam suam; qui conversus ingemiscit, & seipsum punit per pœnitentiam. *Iste in vitam æternam custodit animam suam.* S. Rupertus Abb. l. 1. in Deut. 24.

Qui pœnitentiam agit, paratus esse debet ad opprobria perferenda, injuriæque subeundas; nec commoveri, si quis ei peccati sui crimen objiciat. Ergo qui pœnitentiam agit, offerre se debet ad pœnam, ut hic puniatur à Domino, non ad supplicia æterna servetur! nec expectare tempus; sed occurrere divinæ indignationi. S. Ambrosius, in Ps. 37. in initio.

§. XXIX.